



Boris Johnson.

MAD

# I cumenza mal per primminister Johnson

Sias visitas ad Edinburgh, Belfast ed en la Valisa

DA GUIU SOBIELA-CAANITZ

■ **Boris Johnson (\*1964 a New York, sutbiadi d'in minister osmanic, anteriur president communal da Londra ed anteriur minister britannic da l'exteriur) è primminister britannic dapi ils 24 da fanadur 2019.** Ussa vul el il pli svelt pussaivel, pia aunc 2019, cumplir il giavisch da 51,89 % da votantas e votants britannics ils 23 da zercladur 2016: «Leave», sortir da l'Uniun europeica (UE), il Brexit. Il problem è ch'il Reginam uni (United Kingdom) n'è tuttina betg uni en chaussa: 62 % dals cedels scots schevan «remain», pia restar en l'UE, sco era 55,8 % dals nordirlandais. Oravant tut ha il nov primminister pia stui ir a Edinburgh e Belfast per punctuar ch'el sez saja uss il schef. Ma la primministra scotta *Nicola Sturgeon* (\*1970) e cunzunt il «Taioiseach» (schef) da la regenza repu-

blicana irlandaisa, *Leo Varadkar* (\*1975, cun ragischs en India), han fatg domadus endament ch'i hajan tuttina vusch en chapitel.

## Co sortir da l'UE?

Gia l'emprima sentupada a Edinburgh ha trumpà il giast conservativ da Londra. *Ruth Davidson* (\*1978), scheffa dals conservativs scots, ha punctuà ch'ella refuseschia ses plan da sortir da l'UE senza contract relativ. Sturgeon ha lura declerà ch'ella pretendia in referendum davart l'indipendenza da la Scozia en cas ch'il Reginam uni sortiss de l'UE senza contract en chaussa. La regenza da la Republica irlandaisa da sia vart ha adina procurà che mintga contract escludia la pussaivladad d'endrizzar in cunfin concret e garanteschia la cunvegna dal Venderdi sontg 1998 (10 d'avrigl) tranter las regenzas da l'Irlanda e dal Reginam uni

e las partidas da l'Irlanda dal nord. In'extrada senza contract pudess manar ad installar parts d'in cunfin concret e perfin puspè ad ina guerra civila. Ma l'emprim d'avust 2019 ha manà ina disfatga a primminister Johnson gist en la Valisa, in pajais nua che 52,6 % da votantas e votants avevan respundi «leave» (sa retrair) al referendum da zercladur 2016. Trais onns pli tard ha la partida da Johnson pers il mandat d'in circuit electoral en il parlament britannic. «Ils conservativs han survegnì strusch 39 % da las vuschs, ils liberaldemocrats dentant, aderents dal «remain», 43 % (...) En la chombra ha la coaliziun dals conservativs mo pli 320 mandats cunter 319 per l'opposiziun (...) Era tranter lezs datti adversaris d'ina sortida senza contract relativ, quai che Johnson n'excluda betg» («NZZ», 3 d'avust 2019, p. 3). Co va quai vinavant?